



Il catschadur da Pardé Luis Giger cun ina biala uolp en peil d'unviern.

FOTO H. HUONDER

Catscha dils pli passiunai

En discuors cul catschadur Luis Giger da Pardé

DA HANS HUONDER / ANR

■ **Tut quellas e quels che manegian che la stagiun da catscha seigi a fin tard igl atun sbuglian. Entochen la fin da fevrer van catschaduras e catschadurs aunc a laghetg dall'uolp.** «Quei ei la pli fascinanta catscha», di *Luis Giger* da Pardé. El sa da tgei ch'el tschontscha. Dapi gleiti 30 onns laghegia el ora l'uolp e la fiera da notgs d'unviern. Meinsvart drova ei in stausch per serender dalla stiva caulda ora ella tegia da laghetg, leu nua che las temperaturas ein

– sco per exempel il mument – duront la notg entuorn varga minus diesch grads. La tensiun che regia il mument che l'uolp s'avischina all'estga remplazza denton l'atmosfera dalla pegna scalegl. L'Agentura da novitads rumantscha ha visitau Luis Giger e discurreu cun el davart la catscha da laghetg duront ils meins d'unviern. Per el han mo quels catschadurs success che han bia pazienza e che persequiteschan l'uolp duront igl entir onn ora.

➤ PAGINA 3



L'uolp ei en mira dil catschadur durant la catscha da laghetg che cuoza dil november entochen la fin da fevrer.

FOTOS H. HUONDER E L.O.



Entgins bials fols d'uolp dalla catscha da quest unviern.

«Pazienza, pazienza ed aunc ina ga pazienza»

La catscha da laghetg ei ina pissiun cumbinada cun bia perseveronza e sentiment per la selvaschina

DA HANS HUONDER / ANR

■ **Dall'entschatta november entochen la fin da fevrer ha la catscha da laghetg liug el cantun Grischnun. Per entgins paucs catschadurs eis ella la pli biala catscha. Dapi bunamein 30 onns ei la catscha da laghetg durant las freidas notgs d'unviern era la gronda pissiun da Luis Giger da Pardé en Val Medel. Bein enqual uolp ha el sittau en quels onns giud l'estga.** El cantun Grischnun entscheiva la stagiun da catscha il settember e vegn terminada la fin da fevrer. En quei interval han liug la catsch'aulta, la catscha bassa, la catscha da capricorns e la catscha d'atun. Il november entscheiva mintgamai la catscha cun traplas e quella da laghetg. Quellas duas catschas han en mira ils animals da rapina: L'uolp, la fiergna ed il tais. Fertion che l'uolp astga vegnir pigliada e sittada entochen la fin da fevrer ei la catscha sil tais lubida sulettamein entochen miez schaner e quella dalla fiergna entochen miez fevrer. La catscha da laghetg astga vegnir exequida sulettamein d'in baghetg ferm anora. Biars catschadurs nezegian persunter tegias da laghetg construidas sapientivamein per quei intent ni era nuegls e clavaus. La catscha da traplas astga vegnir exequida el cantun Grischnun sulettamein cun la trapla da truca. Quella sto vegnir controllada mintga damaun, igl animal pigliau astga vegnir sittaus. Pli baul vegnevan era traplas da fier en funcziun alla catscha digl unviern. Per ils animals pertuccai eran quellas ina barba-

ria. Dapi biars onns ein ellas scumandadas.


La 52avla patenta

Sch'ins plaida dalla catscha e da catschadurs en Val Medel, lu tschontschan ins era dils catschadurs da Pardé e buc il pli davos da Luis Giger. Igl atun vargau ha el priu la 52avla patenta da catsch'aulta. Dapi 1959 va el regularmeins alla catscha e dapi 1983 ei sia mira era drizzata igl unviern sin la catscha da laghetg. «Avon ei quei mai stau in grond tema. En emprema lingua pervia dalla famiglia e lu era pervia dalla professiun», di Luis Giger. 23 onns eis el ius sin viadi cun segiradas da Winterthur, avon eis el staus engaschus sco scriinari ni era tarsiel e signun si d'alp. Parallelmeins ha el tgirau in pign menaschi puril, las davosas nuorsas han bandunau siu nuegl avon dus onns. Sin la damonda, tgei muntada che la catscha da laghetg hagi per el, rispunda Luis Giger senza targlinar: «Quei ei la pli fascinonta catscha ch'ei dat. Ella pretenda pazienza, pazienza ed aunc ina ga pazienza. Ei dat nuot pli bi che da spitgar sin l'uolp, pertgei enzacu vegn ella.» La pazienza ei denton mo ina qualitad indispensabla ch'il catschadur sto haver igl unviern. In'otra ei la disciplina da metter estga, mo era il sentiment per in bien liug da catscha. La fin finala eis ei era buca caussa da mintgin da serender las seras d'unviern ord stiva caulda e tschaghignar uras en ed uras ora sil liug dall'estga nua che l'uolp ni forsa schizun ina fiergna duess cumparer. Malgrad la ferdaglia da bein enqual notg di Luis Giger senza ve-

gnir cotschens: «Freid hiel jeu mai giu en tegia da laghetg e la grippa hiel jeu era mai priu a casa cun mei.» Schelar astgi ins buc alla catscha da laghetg, leutier stoppi ins star bein durant quellas uras. El discuors cun Luis Giger sent'ins sia fascinaziun per la catscha da laghetg ni semplamein era siu plascher vid l'uolp e la fiergna.

Cu vegn ella?

Tgi che serenda alla catscha da laghetg sa che quella catscha ei tut speciala ed ina cumbinaziun fascinonta da bia aventuras e misteris. Il misteri grond ei senz'ater il sedepurtar dall'uolp. Buca per nuot plaidan ins dalla «mala uolp». Tonaton fa ella ina ga ni l'otra tuttina il sbagl e serenda sin l'estga il mument ch'il catschadur ei postaus en sia tegia da laghetg. «Ella media hiel jeu sittau en quels bunamein trent'onns tschun ni sis uolps per unviern. Ina ga ni l'otra unginas dapli. Ei ha denton era dau unviarns pli maghers. Mintgatun – mo strusch aschi savens sco l'uolp – cumpara ina fiergna sin l'estga e mintga zacu era in tais. Ensem cun siu fegl Rinaldo dispona Luis Giger da duas tegias da laghetg en Val Medel. «Jeu serendel mintga di el liug per mirar sch'ei ha dau moviment la notg avon. Gest tenor indezis vegn lu iu alla catscha la notg vegnenta», di Luis Giger, in catschadur cun tgierp ed olma. Mo paucas notgs durant igl unviern ein la fin finala encoronadas da success: «Sch'ins sietta mintga tiarza notg da catscha in'uolp, lu astg'ins esser cuntents. Enza-



Bein enqual notg freida d'unviern passenta il catschadur pissiunau en sia tegia da laghetg, sco per exempel quella cheu a Mustér.

cu ei l'uolp denton aunc adina vegnida. Magari cumpara ella denton era mo sin ina distanza memia liunga ni ch'ella stat veramein buca bein il mument ch'ei fuss da dar il siet.» Quei mument che l'uolp seigi sin l'estga stoppi il catschadur mantener saung freid: «Lu astg'ins buca vegnir nervus. Ei ha num restar ruasseivels ed en miu cass special forsa era aunc da metter la pipa dalla vart.» Luis Giger ha buca mo sittau biaras uolps, mobein era bialas. Aunc dacuort eis ei reussiu ad el da sittar in'uolp masculina cun ina peisa da nov kilos.

Ils temps semidan

Rodund 30 uolps vegnan sittadas mintg'unviern da catschadurs da Medel sin territori da lur vischnaunca. Plirs dad els tilan giu ils fols dallas uolps e serendan lu cun quels al marcau a Tusaun. Ils prezis

per ils fols d'uolp ein sereduci marcantamein ils davos dus decennis. «Ils onns otgonta vegneva aunc pagau entochen 60 francs per il fol dall'uolp ed 80 francs per quel dalla fiergna. Oz ston ins esser cuntents sch'ina uolp va per diesch francs», di Luis Giger. Fertion ch'ils fols vegnevan vendi pli baul a marcadonts che serendevan per quei intent en Val Medel, vegnan els offeri oz a singuls marcadonts ch'ein presents alla fiera grischnuna a Tusaun. In'entrada supplementara han ils catschadurs da Medel entras la taxa che la vischnaunca e la secziun pagan: «Nus survegnin dalla vischnaunca trenta francs per uolp e dalla secziun aunc ina ga diesch francs.» Suentar ch'il cantun ha decidu da desister da pagar la taxa han era biaras vischnauncas nezegiau la caschun da strihar quella. La vischnaunca da Medel ein ina dallas excepziuns.



Luis Giger alla fiera da fols d'uolp avon dus onns a Tusaun.

reclama

H&K Handelskammer und Gewerbeverband Graubünden
Bündner Gewerbeverband Dachorganisation der gewerblichen Wirtschaft

Wir unterstützen

Christian Rathgeb

als Regierungsrat

Regierungsratswahlen am 29.1.2012 www.christian-rathgeb.ch